



Johann Coaz ha construi ils emprims mires da lavinas ed è ascendì sco emprim sin il Piz Bernina.

FOTOS LIVIA MAUERHOFER

Il «canalles» Johann Coaz

A partir da damaun mussa il museum retic a Cuira ina exposiziun davart vita ed ovra dal scienzià ed alpinist grischun Johann Coaz che ha vivì dal 1822 fin l'onn 1918 e che ha perscrutà sin blers champs ed è stà inspectur forestal dal Grischun e da Son Gagl.

MARTIN GABRIEL/FMR

Johann Coaz ha vivì ina gronda part da sia vita en il chantun Grischun, ma era en il chantun Berna. El era tranter auter burgais da S-chanf, da Valchava e Küblis e burgais d'onur da Haldenstein. La directura dil museum retic, *Andrea Kauer Loens* ha ditg ch'ella haja duvrà ditg da sa laschar persvader per ina exposiziun pil 200avel anniversari da Johann Coaz. «Jau na vulev betg organisar in imni als gronds umens dal 19avel tschientaner.» Persvas ella haja lura igl argument che Coaz saja stà in dals emprims protecturs da la natira. En connex cun la midada dal clima e la digren dals glatschers ch'è in tema fitg actual, ha la directura dal museum lura tuttina decidì da far l'exposiziun. «Al cumenzament ha Johann Coaz stuì proteger il carstgaun da la natira per exempel cun la construcziun dals emprims rempars da lavinas. E pli tard ha Coaz cumenzà a proteger la natira dal carstgaun.»

Mesirar – reglar – ordinar

L'organisatura da l'exposiziun e collavuratura scientifica dal museum retic, *Silvia Konzett*, ha manà tras l'exposiziun cun in sguard en il temp da vita da Johann Coaz. Durant il 19avel tschientaner hajan scienziads perscrutà il mund cun novas metodas ed empruvà da pre-

schentar el sistematicamain. «Biologs, geologs e glaziologs han declerà la natira, cartografs han mussà la cuntrada, inschigners han amplifitgà la rait da traffic e protegì la populaziun cunter privels da la natira, ha *Silvia Konzett* ditg. «Plaun a plaun è dentant era vegnida la conscienza, ch'igl saja era da proteger la natira surexplotada da la civilisaziun. En mintga cas è Johann Coaz era sa participà da quest svilup sco inschigner, perscrutader da la natira, inspectur forestal e sco alpinist.» L'exposiziun vul accompagnar visitadras e visitaders tras ils blers champs da d'activitad da Johann Wilhelm Fortunat Coaz ch'ins pudess era numnar in scheni u in «canalles» da ses temp. Sin quai viadi emprendain nus d'enconuscher la lavur multifara da Johann Coaz.»

Rolla impurtanta per il Grischun e per la Svizra

Suenter ses studi ha Johann Coaz lavorà plirs onns sco topograf da muntogna e collavurà per la basa da plirs fegls da la Charta Dufour. En quest connex ha Coaz fatg la primascensium da blers pizs grischuns, tranter quels er il Piz Bernina. Durant la guerra da la Lia separatista, l'onn 1847, è Johann Coaz, secretari privat dal General Dufour. Sco inspectur forestal dal chantun e pli tard da la Confederaziun ha Coaz organisà da nov la selvicultura e stgaffi regu-

lazions legalas per ina economia forestala persistenta. El ha planisà ils emprims rempars da lavinas, endrizzà erbaris e planà bostgs exotics. El è s'engaschà per il Parc Naziunal Svizzer. Johann Coaz e stà bier sin viadi, e tgirà contacts cun autoritads. Sias activitads èn documentadas en ses cudeschs da notizias. Coaz è era stà commember da bleras uniuns specializadas, ha scrit numerusas publicaziuns e salvà blers referats. El è ì en pensiuin pir en l'auta vegliadetgna da 92 onns.

Trer a niz e proteger

L'Institut per la perscrutaziun da la cultura dal Grischun sa participescha a l'exposiziun da Johann Coaz cun la publicaziun dil cudesch «Nutzen und schützen». Il tema è Johann Coaz ed il guaud ed il cumenzament da la politica da l'ambient en Svizra. Auturs da questa publicaziun èn *Cordula Seger, Karin Fuchs, Paul Eugen Grimm e Martin Stuber*. La vernissascha dal cudesch ha lieu ils 26 da november 2021 en il museum retic. En il rom da l'exposiziun davart Johann Coaz han er lieu tranter auter en il museum ina occurrenza a chaschun da la Sonda lunga, ils 13 da november, ina guida cun in architect da la cuntrada en la citad da Cuira ed in referat davart il svilup da la protecziun cunter lavinas da *Gian Cla Feuerstein* da l'Uffizi chantunal per guaud e privels da la natira.



Andrea Kauer Loens, directura dal museum retic (san.) e la manadra da project Silvia Konzett, las protagonistas da l'exposiziun spetgan cun brama sin la vernissascha ch'è occupada fin il davos plaz.

FOTO ROLAND SIGNER

Scienzià e giramund cun ragischs grischunas

Johann Wilhelm Fortunat Coaz è naschì l'onn 1822 ad Antwerpen en la Belgia. La gronda part da sia uffanza ha el passentà a Cuira. Coaz ha studegià economia forestala ed e lura stà plirs onns en servetsch tar Henri Dufour, l'ultim temp sco secretari privat dal general Dufour. L'onn 1852 ha Johann Coaz maridà Pauline Lütcher ed ha gi sis uffants cun ella. Ina gronda part da sia vita ha Coaz, ch'era er in alpinist da renum ed è stà confundatur dal Club alpin svizzer, fatg var 20 primascensiums sin pizs grischuns, las bleras primascensiums ha el fatg en l'Engiadina. Johann Coaz ha lavorà la gronda part da sia vita fin 92 onns sco inschigner forestal chantunal e pli tard federal. Ils davos onns da sia vita enfin l'onn 1918 ha el passentà a Cuira. (mg/fmr)